

禹

貢

匯

疏

禹貢滙疏卷八

吳興茅瑞徵纂并箋

男亂京亂武全

華陽黑水惟梁州

傳東據華山之南西距黑水

疏周禮職方氏豫

州其山鎮曰華山在豫州界內此梁州之境東據
華山之南不得其山故言陽也此山之西雍州之
境也 九域圖載疏云華山四州之際東北曰冀
東南曰豫西南曰梁西北曰雍以華山十字分之
四隅乃四州也 曾氏曰華山卽西嶽在梁雍之

東其陽爲梁州其陰爲雍州 杜佑曰漢中郡城
固卽捷爲縣有黑水又南溪郡戎州南溪縣黑水
自北南流經於此同昌郡有黑水東南流入白水
水經注云自夔道至朱提有水步道有黑水羊
官水三津俱險極難行禹貢黑水註云出南寧州
南廣縣汾關山北至夔道縣入江一名皂水矣

晉地理志西方金剛之氣彊梁故因名焉周禮職
方氏以梁并雍漢不立州名以其地爲益州春秋
元命苞云參伐流爲益州益之爲言阨也言其所

在之地險阨也亦曰疆壤益大故以名焉

漢武帝元朔二

年改梁曰益州以新啓徒爲犴柯越雋州之疆壤益廣故稱益云凡水經注

賈逵曰

梁米出於蜀漢香美逾於諸梁號曰竹根黃梁州之名因此

杜佑曰梁州當夏殷間爲蠻夷國所謂巴賔彭濮之人也周末秦伐蜀有其地於天文兼參之宿亦秦之分野又得楚之交秦并天下置郡爲漢中巴蜀及隴西郡內史之南境自漢以後歷代開拓氏羌戎夷之地漢武帝置十三州此爲益州魏分置

梁益二州晉初因之 漢地理志秦地南有巴蜀

廣漢犍爲武都又西南有牂牁越雋益州皆宜屬

焉巴蜀廣漢本南夷秦并以爲郡土地肥美武都

地雜氐羌及犍爲牂牁越雋皆西南外夷武帝初

開置民俗畧與巴蜀同

漢高發巴蜀之人定一秦遷巴之渠率七姓居於商

洛風俗不改見隋志

後漢郡國志益州刺史部郡國十二

漢中巴郡廣漢蜀郡犍爲牂牁越雋益州永昌廣

漢屬國蜀郡屬國犍爲屬國 馬端臨曰漢時爲

郡九曰漢中廣漢蜀巴益州武都牂牁越雋犍爲

又爲弘農郡之南境 唐地理志古梁州城山南

道興元

府漢中郡

洋鳳興成文扶利集壁巴蓬通開閬

果渠爲鶉首分以西道採訪使治梁州金忠涪萬

亦鶉首分以東道採訪使治襄州隴右道岷

和政郡

階疊宋亦鶉首分以隴右採訪使治鄯州劔南道

漢蜀郡廣漢犍爲越嵩益州牂牁巴郡之地總爲

鶉首分府一

成都蜀郡

都護府一

保寧

州二十八以劔南

採訪使治益州 杜佑曰唐分置山南西道爲漢

中 梁通川

通

巴川

合

清化

巴

洋川

洋

順政

興

河池

益昌利 咸安達 盛山開 始寧壁 南平渝 符陽集

璘山渠 郡山南東道為房陵房 南賓忠 南浦萬 雲

安夔 郡劔南道為蜀郡益 唐安蜀 濛陽彭 德陽漢

通義紆 梓潼梓 巴西綿 普安劔 閬中閬 資陽資 臨

邛邛 通化茂 交川松 越雋雋 南溪茂 遂寧遂 仁壽

陵捷為嘉 廬山雅 瀘川瀘 陽安簡 安岳普 江源當

陰平文 同昌扶 油江隴 臨翼翼 歸誠悉 洪源黎 靜

川靜 恭化恭 維川維 和義榮 雲山奉 蓬山拓 雲南

姚南克果 郡兼分入京畿為上洛商 安康金 郡隴

右道爲同谷

成

武都

武即階州

懷道

岩

合川

壘

郡及黔

中道涪陵

涪

南川

南

郡

唐十道圖古梁州爲山

南西道領梁洋集通開壁巴蓬渠涪渝合鳳興利

閬果十七州劔南道領益蜀彭漢綿劔梓遂普資

簡陵邛眉雅嘉榮瀘戎黎茂龍扶文當松靜拓翼

悉維雋姚凡三十有三州兼及隴右道成武疊宕

等州

初學記云梁州自劔閣而南分爲益州是爲劔南道其北垂又入隴右道

宋爲

川峽四路成都府路府一成都州十二着蜀彭綿

漢嘉邛簡黎雅茂威軍二末康石泉監一仙井潼

川府路府三潼川遂寧州九果資普昌叙瀘合榮

渠軍二懷安廣安監一富順利州路府一興元州

九利洋閬劔

即隆慶府

文興蓬政

本龍州

巴軍一大安夔

州路州七夔忠萬開達涪恭

即重慶府

軍三雲安梁山

南平監一大寧南渡後頗更置云 馬端臨曰宋

平孟蜀盡得梁州之地分爲益州利州梓州夔州

四路爲州五十八成都興元漳州遂寧等府洋商

金房達渠渝涪瀘巴璧遂集合忠萬閬果普開夔

嘉簡陵者榮資叙鳳階成興文龍利劔綿漢彭蜀

邛雅茂威黎等州

班固配十二次自畢十二度至東井十五度爲實

沈於辰在申魏之分野屬益州

費直起畢九度
蔡邑起畢六度

陳卓京房張衡並云觜參魏益州 天文占候曰

太白金星觜張星主井五車卿星狐弧星俱主益

州 淮南子曰西南方曰朱方其星觜觶參爲益

州分野 春秋緯文耀鉤云荆山西南至岷山北

距鳥鼠梁州屬開星 星經玉衡第二星主益州

常以五亥日候之乙亥爲漢中丁亥爲永昌巳亥

爲巴郡蜀郡牂牁辛亥爲廣漢癸亥爲犍爲

張華曰蜀漢之土與秦同域南跨邛笮北阻襄斜西卽限礙隔以劔閣窮險極峻獨守之國也 考

索曰巴蜀自昔號爲富饒漢高東向爭天下獨命蕭何留收巴蜀以給軍是以巴蜀之資取天下也

殷仲堪曰劔閣之險蜀之關鍵巴西梓潼宕渠三郡去漢中遼遠在劔閣之內而統屬梁州 章

俊卿曰自涪陵極於成都 地險塞沃野千里控

渝扼瀘聯接關隴人皆知巴蜀之險然以巴蜀爲

要害以漢中爲門戶則巴蜀之險可得而有也漢高祖自南鄭以克三秦諸葛孔明自漢中以鎮關隴則漢中之形勢爲可用也 牟子才曰漢中前瞰米倉後蔽石穴左接華陽黑水之壤右通陰平秦隴之墟黃權以爲蜀之股肱楊洪以爲蜀之咽喉四嶽三塗皆不及也益昌之南陸走劔而外東西川在焉冰走閬果而去適夔峽西則趣文龍二州東則會集壁諸郡而烏龍桔柏又在其前歐陽詹以爲九州之險司馬光以爲秦蜀之衝又曰重

慶爲保蜀之根本嘉定爲鎮西之根本夔門爲蔽
吳之根本 林駟曰蜀之根本在成都而漢中爲
唇齒漢中爲保蜀之藩籬而以陝隴爲遞援守南
鄭則長安可窺守武興則隴西可取 武夷熊氏
曰梁州卽今全蜀之地成都潼川興元利州夔州
等路五十四州或言秦以前未嘗通至秦鑿山開
道關塞始通恐止言金牛一道耳岷嶓沱潛蔡蒙
和夷禹之故迹何嘗不通中國也大抵蜀地北與
秦隴接境實爲天下要脊世治則服從世亂則割

據牧守不可不慎

箋考一統志古梁州爲今四川省成都

古蜀國

保寧

順慶叙州

古夔國

重慶

周巴子國

馬湖

梁州東境

龍安各府瀘

川

蜀漢梓潼郡

嘉定着邛瀘雅各州而雲南

滇國

大理

唐南

詔臨安

漢牂牁地

楚雄

漢益州地

潞江

古西南夷

廣西

古滇國東南境

各

府曲靖

漢益州地

武定

古滇國地

麗江

漢越嵩益州地

三軍民府並

屬梁州界未寧宣撫司天全六番招討司則梁州

南境黎州安撫司則梁州西境金齒軍民指揮司

古哀牢國則梁州西南徼外地貴州普安州

古夜郎地

亦梁

州界陝西漢中府則梁雍二州域四川夔州府湖
廣施州衛則荆梁二州域貴州宣慰司則荆梁二
州之南境平茶洞長官司亦荆梁二州界也 鄭
氏曉曰華陽是陝西商洛湖廣襄陽府西屬四川
夔州府所屬巫山大昌大寧之地黑水是疊溪黑
水自梁北境至安縣入江與導黑水之黑水似無
干志者止見黑水流南至西極今四川成都重慶
順慶保寧叙川馬湖六府潼川州梓州嘉定州瀘
州雅州夔州府所屬奉節雲陽萬縣開縣達縣新

寧梁山建始陝西鞏昌府所屬成縣西和秦州漢中
中所屬金州所屬及沔縣芒部軍民府龍川宣撫
司平茶洞長官司疊溪軍民千戶所湖廣施州軍
民指揮司西境其烏蒙等處原不係域中者不載

考地志湖廣鄖陽府屬梁州陝西西和縣屬雍州漢中府爲梁雍荆三州域金州荆梁之交謂秦頭

楚尾今興安州

曹學佺曰秦始皇置三十六郡漢中其

一也按梁州山在郡東南百八十里四面皆大山
其中三十里甚平曠相傳以爲古梁州 四川名
勝志曰黑水出故漳臘潘州界今屬夷地是爲岷

江之始水自汶山下過猶河水之遶崑崙也又一
派入滇而出金沙江流入馬湖江會與汶水合今
之叙瀘界瀘卽黑也諸葛亮五月渡瀘以征西南
所必經也說文川者穿也水穿地中故曰川岷江
一水也瀘一水也雒一水也渝一水也雒中水也
先主入蜀至江陽遡雒至涪城而取劉璋今之綿
州是也雒水繇金堂出內江與外水合外水卽汶
水也渝巴水也源出巴山流遠巴州曲折如巴字
亦名字水由遂合以至渝州其委耳巴縣設焉古

巴子都也蜀江之水非一而岷瀘雒巴爲四大川也四川之名所由昉與宋南渡後始分益梓利夔四路卽今之四川矣但益在川西夔在川東利梓俱在川北而川南似闕蓋古者以犍爲屬廣漢乃又置提點刑獄司於嘉定重慶潼川三府嘉定則川南也重慶則上川東與川南接壤潼川卽梓州又川西北之門戶也四川總志曰四川古梁州地漢置益州部刺史察舉蜀巴廣漢犍爲牂牁越雋等郡而不常所治東漢益州刺史治雒

卽今漢州唐

貞觀中於此置劔南道開元中置劔南并山南東

西道採訪處置使而劔南治蜀宋爲西川路後分

西川爲東西兩路又分益梓利夔四路安撫司俱

以守臣兼領

楊慎曰四川取岷江沱江黑水白水四大川以爲各或云成都爲西川潼

關爲東川利州爲北川夔州爲南川

唐樞曰四川天下絕險龍州

松蕃鎮其北播州諸夷列其南天全黎州當其西

瞿唐守其東江山四塞關峽孤開可守一當百又

曰川之形勢北有劔門不足恃而慮在松蕃松蕃

以孤城介生蕃之域乃待食於龍川懸命千里之

外設爲羗戎所截則疊溪以南如建瓴而下直抵茂州無難是誠限外隱穿耳西有黎州不足恃而而慮在維州維州在保縣外無百里乃爲董卜韓胡所據是切近之災且復有靈關一道可抵雅州草坡一道可抵汶川縣泄里壩一道可抵灌縣清溪口一道可抵崇慶州其門庭顯禍乎

岷嶓旣藝

傳岷山嶓冢皆山名水去已可種藝

疏地理志

云蜀郡有湔道岷山在西徼外江水所出隴西郡

西嶓冢山西漢水所出 杜佑曰岷山在通化郡

秦傳汶山縣嶓山在漢中郡金牛縣 蔡傳云地志

茂州漾水所出又云在西縣今興元府西縣三泉縣也

益嶓冢一山跨兩縣云又考通典金牛漢犍為縣

地有嶓冢山禹導漾水至此為漢後魏置嶓冢縣

隋為西縣司馬彪表崧郡因志並言漢有二源東

出氐道西出西 水經注曰江水逕汶山道汶出

縣之嶓冢山 徼外嶓山西玉輪坂下而南行又東逕其縣而東

注于大江又曰岷山東北百四十里岷山中江所

出東注于大江岷山即岷山也在漢嘉嚴道縣山

南有九折坂王子陽按轡處也郭景純江賦曰流

二江於岷嶽又東百五十里曰岷山北江所出東注于大江山海經曰岷山江水出焉 王羲之與

謝安書云蜀中山川如岷山夏含霜電校之所聞崑崙之伯仲也 晁氏曰蜀以山近江源者通爲

岷山連峯接岫重疊險阻青城天彭諸山之所環遶皆古之岷山青城乃其第一峯也

福地記中國名山以青城

峨着爲西嶽佐理

王氏炎曰江漢發源此州方江漢之

源未滌水或汎濫二山下其地有荒而不治者今既可種藝知二水之順流也 華陽國志曰李冰

爲蜀守能知地理謂汶山爲天彭門及至湔道縣見兩山對如闕因號天彭闕乃壅江作壩穿郫江簡江別支流雙過郡下以行舟船岷山多梓柏大竹頽隨水流坐致材木功省用饒又溉灌三郡開稻田於是蜀沃野千里號爲陸海旱則引水浸潤雨則杜塞水門天下謂之天府也 宋史河渠志岷江水發源處古導江今爲耒康軍漢史所謂秦蜀守李冰始鑿離堆辟沫水之害是也沫水出蜀西徼外今陽山江大皂江皆爲沫水入于西川始

嘉肴蜀益間夏潦衝決可畏自鑿離堆以分其勢
一派南流于成都以合岷江一派由末康至瀘州
以合大江一派入東川而後西川沫水之害減而
耕桑之利得矣

箋按史記貨殖傳云汶山之下沃野下有蹲鴟至
死不饑汶山漢書作岷山蓋卽岷山也則岷山之
宜樹藝舊矣

岷說文作巖省作岷漢人
隸書作汶蓋古字通用

沱潛旣道

傳沱潛發源此州入荊州 元費著序成都志曰

文王之化行乎江漢之間有江沱誅於二南之先
然漢統於江以朝宗沱附於江以起興江首四瀆
歷代祠其神於成都故成都爲江之源而荆揚之
江特其委爾 地志蜀郡郫縣江沱在東西入大

江又蜀郡汶江縣江沱在西南東入江

杜佑曰沱水在蒙陽

郫唐 水經曰潛水出巴郡宕渠縣又南入于江

郫道元注云潛水蓋漢水枝分潛出故受其稱耳

今爰有大穴潛水入焉通岡山下西南潛出謂之

伏水或以爲古之潛水

宕渠水亦名潛水又名渝水俗謂之渠江

鄭

玄曰漢別爲潛其穴本小水積成澤流與漢合大禹自通漢疏通卽爲西漢水也庾仲雍云墊江有別江出晉壽縣卽潛水也其南源取巴西是西漢水

水

寰宇記曰渠江水源自萬頃池分來經巴達渠廣安等界至合州東北與嘉陵江合卽西漢水

蔡松年南北史補云墊江經仇池過晉壽出宕渠始號墊江至巴郡而入于江

史記正

義曰潛水一名復水今名龍門水源出利州綿谷縣東龍門山大石穴下也臨川吳氏曰凡江漢支流皆名沱潛不拘一處岷嶓藝則江漢之上源治矣沱潛道則江漢之下流治矣

箋沱潛既道兩著于經此其源也既舉岷嶓再舉
沱潛而江漢之源流已備見于梁矣 王氏樵曰

按潛水雖鄭康成猶無考蓋潛則有之而求其首
自漢出則甚難合也蔡傳據地志潛水所出有二
一出巴郡宕渠縣入江一出漢中郡安陽縣鷲谷
入漢然皆未有以考其果自漢出否也若沱則郫
縣汶江皆有沱而入江又江源縣有郫江出江又
反入此皆沱也 疏謂郫之沱安陽之潛尾入江漢
兩首不出江漢也郫江真沱蔡邕
未載宕渠之梁州不言江漢以岷嶓沱潛源流之
潛是從漢出

治見之江河淮漢惟一見而沱潛于二州再書既道何也其名雖同而源委各別也陸深曰今蜀山連綿延亘凡居左者皆曰岷右者皆曰嶓凡水出於岷者皆曰江出於嶓者皆曰漢江別流而復合者皆曰沱漢別流而復合者皆曰沱漢別流而復合者皆曰潛恐屬方言爾故岷謂之汶今汶川是也漢謂之漾或謂之沔或謂之羗今沿漢水而東有寧羗州有沔縣又東有洋縣卽古洋州也洋漾聲相近蓋皆得名於漢水云

蔡蒙旅平

傳蔡蒙二山名祭山曰旅平言治功畢 疏地理

志云蒙山在蜀郡青衣縣

順帝改漢嘉縣

水經曰青衣

水出青衣縣西蒙山東與沫水合也沫水出廣柔

徼外水東至越雋靈道縣出蒙山南東北與青衣

水合酈道元注云漢嘉縣有蒙山青衣水所發東

逕其縣與沫水會於越雋郡之靈關道

靈道縣名靈關道

青衣水又東邛水注之水出漢嘉嚴道邛來山沫

水出岷山西東流過漢嘉縣南流衝一高山山上

合下開水逕其間山卽蒙山也

廣柔縣有石紐鄉相傳禹所生古今

集記云岷山水源分二派正南入溢村至石紐過汶川則禹之所導江也

蘇傳蒙山

今日蒙頂水患平始祭也 九州記云蒙者沫也

言雨露常蒙也山有五頂最高者名上清峯有甘

露井水極清冽四時不涸

關經云蒙頂茶受陽氣全故芳香獨烈

金氏曰蔡山在今雅州嚴道縣南蒙山在今雅州

名山縣東雲霧常蒙其頂其山上合下開沫水逕

其中出爲溷崖水沫水卽大渡河也蜀守李冰嘗

鑿離堆避沫水之害則禹當時于此處用功多也

今考蔡山在雅州東五里蒙山有名山縣治西五里名山縣屬雅州本漢蜀郡嚴道青衣二縣地見四川總志楊慎以蒙山爲雲南蒙樂山非是

續博物志曰沫水自蒙

山至南安溷崖水脉漂疾歷代爲患蜀守李冰發卒鑿平溷崖河神鼻怒冰操刀入水與神鬪遂平

溷崖

秦繼宗曰鑿平溷崖指蒙山說時說蔡蒙二山都是志沫水似誤

馬端臨

曰旅陳也旅平言以平理而陳祭也 陳氏大猷

曰古人舉事必祭况治水大事乎然旅獨於梁雍言之者蓋九州終於梁雍以見前諸州名山皆有祭也旅獨於蔡蒙荆岐言之者蓋紀梁之山終於

蔡蒙紀雍之山始於荆岐以見州內諸名山皆有祭也故下文復以九山川旅總結之

大明一統志曰今雅州城東十里地名旅平相傳夏禹治水功成旅祭于此俗呼爲落平 四川名

勝志曰禹貢梁州之山四岷嶓蔡蒙西山皆岷北山皆嶓南山皆蒙峨嶓之在禹貢則蒙山之首也和夷底績

傳和夷之地致功可藝

蘇傳和夷西南夷名

四川

總志云和夷今黎雅等處又雅州有和夷坝

曾氏曰嚴道有和川

夷人

夷人居之

漢制縣有蠻夷曰道金氏謂和川即青衣水夷人所居本爲羈縻州

寰

宇記云和川路在縣界西去吐蕃大渡河五日程從大渡河西郭至吐蕃松城四日程羌蠻混雜連

山接野鳥路沿空不知里數卽所謂和夷底績也

本志東北有和夷壩是 蔡傳和夷地名巖道以

西有和川有夷道或其地也又按晁氏曰和夷二

水名和水今雅州榮經縣北和川水自蠻界羅岷

州東西來逕蒙山所謂青衣水而入岷江者也夷

水出巴郡魚復縣東南過徭

音恒

山縣南又東過夷

道縣北東入于江今詳經言底績者三單懷原際
既皆地名則此恐爲地名或地名因水不可知也
水經注曰和讀曰桓自桓水以南爲夷書所謂
和夷底績也又曰魚復縣南夷水出焉

箋梁州治水亦以江漢爲主蔡蒙和夷總見水治
而地之險且遠者無不奏効耳和夷一以爲地一
以爲水及考山海經曰和山實惟河之九都是山
也五曲九水出焉合而北流注于河則和亦有以
山名矣

厥土青黎

史記作騷

傳色青黑而沃壤

黎馬云小疏也

疏孔以黎爲黑故云

色青黑王肅曰青黑色黎小疏也釋名曰土青

曰黎似黎草色臨川吳氏曰梁土不言質質不一也

箋考經文厥土未有言色不言質及兩言色者金氏云梁土色青故生物易性疏故散而不實向聞成都土疏難以築城馬說殆近之胡氏贊曰土不言惟者非一種也

厥田惟下上厥賦下中三錯

傳田第七賦第八雜出第七第九三等

疏梁州

之賦凡有三等其出下中時多故以下中爲正上有下上下下有下下三等雜出故言三錯 臨川吳氏曰二錯者或時錯出第七則降揚於下中而梁爲下上或時錯出第九則升兗於下中而梁爲下下通本等第八爲三 胡氏曰梁州夷狄比境變故不常而定出入等似若太優故無事則錯出第七等有事則錯出第九等也

王氏樵曰邵文莊公曰賦錯出者他州無與焉升降之說非是蔡氏曰按賦雜出他等者或以爲歲有豐凶或以爲戶有增減皆非也意者地力有上下年分不同如周官田一易再易之類與按周官有不易之地謂歲種之地爲上田有一易之地謂休一歲乃復種也爲中田有再易之地謂休二歲乃復種也爲下田蔡氏之意謂田遇年分休不耕者多則賦從而少然豈偏冀揚豫梁四州田有一易再易而餘州皆可歲耕者邪蓋冀州地大物繁

賦既上上而又間出上中以寬之豫爲中土原田
既美人功亦脩幾與冀埒故賦既上中而又間出
上上以進之揚田下下然人稠而地力亦盡故賦
高于田二等而間出又進一等此實東南繁阜之
權輿矣梁田下上似優于揚然多山而少田人功
亦劣故賦之等退在下中而又以七九二等爲之
上下間出此其調劑可謂密矣舉此四州爲法而
餘州可見雍與荊州賦田升降皆較六等荊州升
之極人功脩也雍州降之極人功少也其餘相較

不多者從此可知也徐田上中而其賦中中青田
上下而其賦中上竟田中下而其賦下下賦皆降
于田而相較不等竟當河流之衝作十有三載乃
同經已明著其義矣無錯者其等已定有錯者其
等難定時進退以通節之也後代卒不能易禹之
等惟雍州沃野千里秦漢以來稱天府之國而禹
時洪水初平風氣未開觀公劉太王之初起陶復
陶穴則昔之雍州豈後之雍州哉人事未至聖人
固不能預進之也然田曰上上則人事氣化亦已

有所待矣 秦繼宗曰田有三等故定三等之賦
然不以第七爲定賦而以第八爲定賦間歲乃出
第七而又間出第九以寬之仁之至矣楊豫正賦
皆下于間賦一等亦此意也至冀則宜出第一等
而間歲第二無非法中之仁而已

厥貢璆鐵銀鏤砮磬熊羆狐狸織皮

傳璆玉名鏤剛鐵

郭璞云璆
即第磨金

疏釋器云璆琳玉

也郭璞云美玉之別名鏤者可以刻鏤故爲剛鐵
也 蔡傳璆玉磬鐵先於銀者鐵之利多於銀也

蜀卓氏程氏以鐵冶富擬封君則梁之利尤在於

鐵

徐廣曰臨邛出鐵

華陽國志曰臨邛有古石山出石

礦大如蒜子火燒合成流支鐵甚剛因置鐵官漢

文帝以銅鐵賜宦者鄧通通假民卓王孫歲取千

匠故王孫貨累巨萬億鄧通錢亦盡天下管子

曰出鐵之山三千六百九漢關內有鐵官唐天下

有鐵之縣一百三宋鐵冶七十七皆多於漢李

石曰龜脂得火可以燃鐵

左思蜀都賦乾食鐵之獸劉逵註狢獸毛黑白

臆似熊而小以舌舐鐵須臾便斃十勛山建寧郡

鄒氏曰漢志犍爲郡

朱提縣有朱提山出銀每銀八兩爲一流直一千五百八十他銀一流但直一千捷爲郡正梁州之境是梁州之銀獨美於他州故以爲貢 沈括曰世間鍛鐵所謂鋼鐵者用柔鐵屈盤之乃以生鐵陷其間泥封煉之鍛金相入謂之團鋼亦謂之灌鋼此乃僞鋼耳暫假生鐵以爲堅二三煉則生鐵自熟仍是柔鐵予出使至磁州鍛坊觀煉鐵方鐵真鋼凡鐵之有鋼者如麵中有筋濯盡柔麵則麵筋乃見煉鋼亦然但取精鐵鍛之百餘火每鍛稱

之一鍛一輕至累鍛而筋兩不減則純鋼也雖百煉不耗矣此乃鐵之精純者其色清明磨瑩之則黯黯然青而且黑與常鐵迥異亦有煉之至盡而全無鋼者皆繁地之所產 華陽國志曰臺登縣

有孫水一曰白沙江入馬湖水山有砮石火燒成

鐵剛利禹貢厥賦砮是也

寰宇記云定筭縣有鐵石山山有砮石火燒之

成鐵爲鈎戟極剛利名勝志云鹽升衛古定筭縣也今山在衛西北七十里亦近臺登矣

傳貢四獸之皮織金罽

疏釋言云罽罽也舍人

曰罽謂毛罽也胡人績羊毛作衣孫炎曰毛罽爲

屬織毛而言皮者毛附於皮故以皮表毛耳 異

苑云熊無穴或居大樹孔中東土呼熊爲子路 張

曰熊犬身
人足黑色 陸幾云熊能攀緣上高樹見人則顛

倒自投地而下冬多入穴而蟄始春而出脂謂之

熊白羆有黃羆有赤羆大於熊其脂如熊白而麤

理不如熊白美也 爾雅云羆如熊黃白文郭璞

曰似熊而長頸高脚猛憨多力能拔樹木關西呼

曰玃羆 西京雜記云熊羆毛有綠光長二尺者

直百金 蘇傳以屬者曰織以裘者曰皮 王氏熊
曰按屬

西胡毳布織毛爲之若氍毹氍毹
之類字當作編作罽非罽魚網也

箋按貢鐵始於此自漢以後桑孔之徒權利遂與
鹽並昭帝議罷有鹽鐵論至唐理財之官遂號爲
鹽鐵使自乾元初第五琦始也 磬貢于荆又貢
于梁重武事也徐貢浮磬此貢玉石磬豫州貢磬
錯則樂器磬最爲重亦可知矣

西傾因桓是來浮于潛逾于沔入于渭亂于河

傳西傾山名桓水自西傾山南行因桓水是來浮
于潛漢上曰沔 疏地理志云西傾在隴西臨洮

縣西南桓水出蜀郡蜀山西南行羗中入南海則

初發西傾未有水也不知南行幾里得桓水

雍大記曰

桓水在臨洮府城西三里源出西傾山吐谷渾界書西傾因桓注引地志云在隴西郡臨潭縣今按臨潭城去洮州衛七十里實此水之源也書本作桓水經臨洮謂之洮水又謂之桓水

晉

地道記曰梁州南至桓水西底黑水東限扞關

朱子曰西傾雖在雍州其人有事於京師者必取

道梁州因桓水而來故梁貢道及之

鄭道元曰

州山也雍人有事京師道當由此州而來桓是隴坂名其道盤桓旋曲而上故名曰桓恐者因桓之義非浮潛入謂之文

傳越沔而北入渭浮東渡河而還帝都絕流曰亂
疏計沔在渭南五百餘里故越沔陸行而北入
渭渭水入河故浮渭而東帝都在河之東故渡河
絕流曰亂釋水文孫炎曰橫渡也 蘇傳漢始出

爲漾東南流爲沔至漢中東行爲漢沔在梁州山
南而渭在雍州山北沔無入渭之道然按前漢書
武帝時人有上書欲通褒斜道及漕事下張湯問
之云褒水通沔斜水通渭皆可以漕從南陽下沔
入褒褒絕水至斜間百餘里以車轉從斜下渭如

此漢中穀可致此則自沔入渭之道也然褒斜之

間絕水百餘里故曰逾于沔蓋禹時通謂褒爲沔

也

雍大記曰郡縣志漢水經南鄭縣沔水東南流注漢曰沮口師古曰漢上曰沔太史公曰褒斜

箱穀其口

即漢中地

酈道元曰自西傾至葭萌入于西漢

卽鄭玄之所謂潛水者也自西漢遡流而屆于晉

壽界阻漾枝津南歷岡穴迤邐而接漢沔此入漾

書所謂浮潛而逾沔矣歷漢川至南鄭縣屬于褒

水遡褒暨于衙嶺之南溪川支灌于斜川屆于武

功而北達于渭水

褒水西北出衙嶺東南逕大石門歷故棧道下谷又東南歷褒

口即褒谷之南口也北口曰斜又南逕褒縣故城又南流入于漢見水經注又雍大記曰褒谷在漢中府褒城縣東北十里出連雲棧直抵鳳縣斜谷七百里郡縣志曰北口曰斜南口曰褒長四百七十里同爲一谷兩谷高峻中間谷道褒水所流又曰褒水即黑龍江水也源發太白山 雍

錄曰渭之源出隴西鳥鼠同穴山稍東則受秦水秦水者天水郡水也又東則大散關水入之及至武功縣則受斜水矣褒斜二水介衙嶺而分南北此斜水卽二水之分派也斜逕武功而東入于渭也

〔箋〕梁州僻在西南隅去帝都最遠故運道須水陸

並用西傾雖雍州山其南桓水出焉乃梁之水也
桓之東有潛水與桓通故自西傾山下陸運依傍
桓水而來不曰浮桓而曰因桓至潛乃用舟也潛
之北有沔阻漾枝津水淺不得渡必舍舟而陸南
歷岡北逾瀝而接漢沔焉沔之北有渭又阻褒斜
褒水南通沔而斜水北通渭其間絕水百餘里又
必逾褒而歷衙嶺從斜川屆武功以入于渭焉至
渭則絕河而渡卽達帝都矣河卽冀州之西河渭
水自西而東舟自渭入河從河西邊徑往東岸橫

絕而渡不由河中行也 九州貢道梁爲最艱不

惟水陸兼行抑亦轉輸絕險而所挾來貢又皆沉重難致之貨將梁之土產惟此可充天府而往來亦止此有路可通聖人只得另設一運法耳 看

來貢道以水運爲主而陸運以濟其窮故言浮言達其常也惟荆梁間曰逾然必先言浮而歸于達

河未有全用陸者卽此可思貢道之勞逸矣 鄭

氏曉曰西傾因桓是來當合上作一節浮于潛四句是一節梁州是今四川兼有陝西漢中金沔鞏

昌西和成縣秦州湖廣施州等地若貢物俱從西
傾而來是東南至西北登舟矣西傾因桓是來止
言織皮出處與所由來也潛亦非一梁州三十六
江皆是隨處登舟都到沔車行入渭又舟行也西
傾在今臨洮府一云洮卽桓 王氏樵曰西傾在
今臨洮府西南一百五十里一名強臺山洮水出
其北桓水出其南或云洮卽桓水張湯謂以車轉
從斜下渭則漢中穀可致是浮潛逾沔之道漢人
嘗用之今蜀中通貢職水則大江陸則棧道潛沔

入渭之道無復講矣 何景明曰余從入蜀漢道
觀之其西南曰褒谷從褒入南曰駱谷從洋入東
南曰斜谷從郿入其所從皆殊舊志謂首尾一谷
非是其棧道有四出從成和階文出者爲沓中陰
平道鄧艾伐蜀由之從兩當出者爲故道漢高帝
攻陳倉由之從褒鳳出者爲今連雲棧道漢王之
南鄭由之從城固洋縣出者爲斜駱道武侯屯渭
上山之此四道三谷者關南之險阨攻取所從來
固矣

考梁州今爲全蜀之域劔閣巫峽實扼地險而財賦亦向稱沃饒然自宋云巴蜀之粟遠不可漕而頃歲反側殘破之餘更仰餉于楚華陽黑水之區脊脊多事而浮潛逾沔之供亦大異昔全盛時矣

禹貢滙疏卷九

吳興茅瑞徵纂笺

男

亂京
亂武

全訂

黑水西河惟雍州

傳西距黑水東據河龍門之河在冀州西

疏雍

州之境被荒服之外東不越河而西踰黑水王肅

云西據黑水東距西河得其實也禹治豫州乃次

梁州自東向西故言梁州之境先華陽而後黑水

從梁適雍自南向北故先黑水而後西河 雍錄

曰雍州之境西南則包黑水而東距冀河也雍壅

也四面有山壅塞爲固也 李巡曰河西其氣蔽壅受性急凶故云雍雍壅塞也 晉太康地志曰雍州西北之位陽所不及陰氣壅遏故以爲名

晉地理志漢改周之雍州爲涼州蓋以地處西方常寒涼也地勢西北邪出在南山之間南隔西羌西通西域于時號爲斷匈奴右臂獻帝時涼州數有亂河西五郡去州隔遠於是乃別以爲雍州

周禮職方氏正西曰雍州其山鎮曰嶽山

即吳嶽

其

澤藪曰泫蒲其川涇汭其浸渭洛其利玉石其民

三男二女其畜宜牛馬其穀宜黍稷

周之西南不
置州統屬雍

州

杜佑曰以其四山之地故曰雍州周自武王

都於鄠鎬則雍州爲王畿及平王東遷維邑以岐

鄠地賜秦襄公至孝公作爲咸陽築冀闕往都之

謂之秦川亦曰關中地

關中記云東自函關弘農
郡靈寶縣界西至隴關今

沂陽郡沂源縣界二
關之間謂之關中

其在天文東井輿鬼則秦之

分野兼得魏趙之交始皇置四十郡此爲內史上

郡北地九原隴西及雲中之西南境項籍分秦地

爲三國曰雍塞翟謂之三秦漢武帝置十三州以

其地西偏爲涼州又置司隸

領二輔爲京兆左馮翊右扶風

詩

譜秦隴西谷名於禹貢近雍州烏鼠之山周東遷以岐豐地賜之遂橫有周西都宗周畿內八百里之地其封域東至池山在荆岐終南惇物之野

漢地理志秦地界自弘農故關以西京兆扶風馮翊北地上郡西河安定天水隴西西有金城武威張掖酒泉燉煌於禹貢跨雍梁二州詩風兼秦隴兩國鄠杜竹林南山檀栢號稱陸海爲九州膏腴天水隴西民以板爲室屋及安定北地上郡西河

皆迫近戎狄脩習戰備漢興六郡良家子選給羽
林期門以材力爲官名將多出焉自武威以西本
匈奴昆邪王休屠王地武帝時攘之初置四郡以
通西域隔絕南羌匈奴 後漢郡國志涼州刺史
部郡國十二隴西漢陽武都金城安定北地武威
張掖酒泉燉煌張掖屬國張掖居延屬國而京兆
尹左馮翊右扶風皆司隸校尉所部也 馬端臨
曰漢時爲郡十六京兆左馮翊右扶風外有弘農
安定北地上郡朔方五原天水隴西金城武威張

兼蒲泉燉煌凡十三郡而西河雲中二郡之西南

境亦隸焉

唐地理志關內道古雍州城京兆

府本

雍州華同鳳翔

府本岐州

邠隴涇原渭

以原州平涼縣置

武

以原州蕭

關寧慶鄜坊丹延靈威

安州

雄會鹽綬宥爲鶉首

汾麟豐勝銀夏單于安北爲實沈分商爲鶉火分

其京兆華同鳳翔邠商以京畿採訪使治京城餘

關內採訪使以京官領之隴右道古雍梁二州城

漢天水武都隴西金城武威張掖酒泉燉煌等郡

總爲鶉首分自祿山之亂歿于吐蕃至貞元間隴

右州縣盡矣 杜佑曰唐分置京畿爲京兆府 雍

華陰 華 馮翊 同 扶風 岐 新平 邠 郡關內道領安定

涇 彭原 寧 汧陽 隴 中部 坊 洛交 邠 安化 慶 靈武 靈

榆林 勝 延安 延 上郡 綏 咸寧 丹 銀川 銀 平涼 原 九

原 豐 會寧 會 寧朔 宥 五原 鹽 新秦 麟 朔方 夏 等郡

安北府隴右道領隴西 渭 武威 涼 天水 秦 北庭 庭

交河 西 晉昌 瓜 西平 鄯 燉煌 沙 酒泉 肅 金城 蘭 安

昌 河 寧塞 廓 臨洮 洮 和政 岷 張掖 甘 伊吾 伊 等郡

安西府 唐十道圖古雍州爲關內道京兆華同

岐

鳳翔府

邠隴涇原寧慶鄜坊丹延鹽會靈夏豐勝

綏銀凡二十有二州隴右道秦渭洮岷河蘭鄯廓

涼甘肅瓜沙等州 初學記曰關內道東自回華

畧河而北西自岐隴原會極于北垂隴右道自隴

而西盡其地也

雍州自岐隴已北爲關內道自隴而南并得禹貢梁州之北地爲隴

右道 宋爲陝西路慶曆初分陝西沿邊爲秦鳳涇

原環慶鄜延四路熙寧五年以熙河洮岷州通遠

軍爲一路置都總管經畧安撫使又以熙河等五

州軍爲一路通舊鄜延等五路共三十四州軍後

分永興保安軍河中陝府商解同華耀號鄜延

期延

安府丹坊環慶

即慶陽府

邠寧州爲永興軍等路鳳翔府

秦階隴鳳成涇原渭熙河洮岷州鎮戎德順通遠

軍爲秦鳳等路仍以永興鄜延環慶秦鳳涇原熙

河分六路各置經畧安撫司而麟府二州屬河東

路馬端臨曰宋爲陝西路及河東路

麟府二郡

內夏

銀綏宥靜靈鹽諸郡爲西夏所據其涼瓜沙肅西

伊安北安西北庭亦沒於西夏及諸蕃熙寧五年

以陝西五路三十四州軍分爲兩路永興軍等路

爲京兆河中府陝延同華耀邠鄜解環慶虢商寧
丹坊等州保安軍秦鳳等路爲鳳翔府秦鳳涇渭
河隴階成熙原蘭岷等州鎮戎德順通遠軍紹興
初置川陝等處宣撫處置使富平之敗五路俱陷
僅守鳳翔之和尚原和議成歸陝西地尋背盟再
取止餘階成岷鳳四州屬四川之利州路云

班固配十二次自東井十六度至柳八度爲鶉首

於辰在未秦之分野屬雍州

費直起井十二度
蔡邕起井十度

陳卓京房張衡並云東井輿鬼秦雍州

張衡云

漢津者金之氣也其本曰水

按陝西乃金水之位而河漢之源並在于

此

春秋元命苞曰東井鬼星散爲雍州分爲秦國東距殺阪西有漢中南含高山北阻居庸得東井動深之萌其氣險也 春秋緯文耀鉤曰華岐以西龍門積石至三危之野雍州屬魁星

張良曰關中左殺函右隴蜀沃野千里南有巴蜀之饒北有胡苑之利阻三面而守獨以一面東制諸侯諸侯安定河渭漕輓天下西給京師諸侯有變順流而下足以委輸此所謂金城千里天府之

國也 班固賦曰漢之西都在於雍州實曰長安
左據函谷二嶺之阻表以太華終南之山右界殽
針隴首之險帶以洪河涇渭之川衆流之隈汧涌
其西華實之毛則九州之上腴焉防禦之阻則天
地之隩區焉 武夷熊氏曰雍州秦地周之岐豐
鎬京漢之三輔皆此婁敬謂金城「里天府之國
合天下形勢言之秦得百二者實以據地勢之上
游當天下之要脊四塞以爲固全一面之險以東
制諸侯故言定都者必先焉書以黑水西河爲界

而又西接弱水流沙則土地之廣可知大抵關中形勢可以爲都但地迫西戎周秦漢唐世有羌胡之患必盡陰山與唐三受降城及靈夏河西五郡爲塞乃可爾 潛室陳氏曰自古入關有三道一

自河北入爲正道

項羽漢光武安祿山

一自河南入爲間道

漢高祖桓溫檀道濟劉裕

一自蜀入爲險道

漢高祖關中由中道入巴蜀爲漢王

巴而又從此路出定關中諸葛亮亦從此出師

朱子曰前代所以都關

中者以黃河左右旋繞所謂臨不測之淵也近東獨有函谷關一路通山東故可據以爲險又關中

之山皆自西而東若橫山之險乃山之極高處本朝則自橫山以北盡爲西夏所有據高以臨我是以不可都也又曰雍州土厚水深其民重厚質直以善導之易以興起而篤於仁義以猛驅之其強毅果敢之資亦足以強兵力農而成富強之業韋俊卿曰自蜀江東下黃河南注而天下大勢分爲南北故河北江南皆天下制勝之地而挈南北之輕重者又在川陝夫江南所恃以爲固者長江也而四川據長江上游下臨吳楚其勢足以奪長

江之險河北所恃以爲固者黃河也而陝西據黃河上游下臨趙代其勢足以奪黃河之險是川陝二地常制南北之命又曰黃河曲折大勢如覆斗之狀而關中正在斗間 李綱曰天下形勢關中爲上襄鄧次之建康又次之 歐陽脩曰唐世牧地皆與馬性相宜西起隴右金城平涼天水外洎河曲之野內則岐幽涇寧東接銀夏又東至於樓煩皆唐養馬之地也

箋按雍州以四面積高得名山最高而不言止言

黑水西河者以不勝紀也

鳳翔府有雍山藥水所出州名亦以此

考一統志古雍州域今陝西省西安

秦內史漢京兆

鳳翔

平涼鞏昌臨洮慶陽

義渠戎國

延安各府寧夏洮州岷

州河州靖虜各衛寧夏中衛

唐靈州地

陝西行都司所

屬而漢中府

即漢向鄭

則梁雍二州域其文縣千戶所

周雍州地近梁

鄭氏曉曰雍州之域陝西西安

延安慶陽平涼鳳翔臨洮六府鞏昌府所屬隴西

安定會寧通渭漳縣寧遠伏羌階州徽州兩當漢

中府所屬南鄭褒城城固洋縣西鄉鳳縣畧陽陝

西行都司所屬甘肅一鎮及岷州洮州二衛文縣
千戶所古沙州據岷嶓旣藝則鞏昌府大半當屬
梁州據西傾因桓是來則臨洮府州縣亦當有屬
梁者雍之西境黑水當是鎮夷黑水與經導黑水
不同且與註據字合夫雍稱天府所謂秦中自古
帝王州也其險四面山迴而東面臨中原險處正
在華嶽與黃河會處雖在潼關然必南有河之南
今河南府新安函谷北有河之北今山西平陽府
平陽南有東鳥嶺北有冷泉關若河之南無新安

則由沙澗可渡河至蒲州河之北無平陽則由烏嶺冷泉入平陽至蒲州自蒲州至龍門兩岸平廣可渡者百里秦據函關陝西統平陽也夫守河北者當守陝西守陝西者當極力守平陽河南府無陝西則河之南江之南皆不可守五胡以迄宋元皆爛鑑也又曰東距西河者今陝西西安府同州朝邑縣及臨河諸縣是也據蔡傳及職方豫州其山鎮曰華山則西安府東境華陰華州當屬豫而臨河諸邑皆當爲冀州地一統志俱作雍州豈別

有據乎

考寧夏靖虜衛靈州千戶所並屬雍州漢中府爲鳳縣梁雍之交與安州荆梁之交

延安府多上郡地爲雍州城及冀州西境

陝西志曰陝西古雍州地

然兼有梁荆豫冀四州宋陝西亦又南得成都府

路之興元府城固褒城廉水三縣及洋文沔金房

階西和鳳七州大安一軍東得冀州河東路之麟

府二州及石州之葭蘆吳堡二砦地 舊陝志曰

柳星及張雖豫州星野而雍之分野亦得柳之七

度至張十七度寢及鶉火之次焉故唐志曰柳在

鬼東接于漠源當商洛之陽又曰雍之分野通曰

井鬼而其實亦有九州之星 雍大記曰黑水在
城固縣西北源自太山南流入漢水水經漢水又
東黑水注之諸葛亮牋云朝發南鄭暮宿黑水

丘氏濬曰周九州與禹貢不同者周都雍王畿不
可不廣梁多險阻故合雍梁爲一時碣石淪于海
徐地狹故青兼之堯舜都冀壤最濶今京師山西
外包虜境故此分幽并又曰唐人牧馬置八坊四
十八監其牧地在岐蘭涇寧間卽今陝西鳳翔府
及西安之邠州平涼之涇州慶陽之寧州其地也

本朝於此地立行太僕寺一苑馬寺一以司蕃牧而苑馬所轄凡三十監監皆有馬然百年于茲馬之蕃盛不及唐之一二

弱水既西

傳導之西流至於合黎

疏鄭云衆水皆東此水

獨西故記其西下也 山海經曰西海之南流沙

之濱赤水之後黑水之前有大山名曰崑崙之丘

其下有弱水之淵環之

郭璞注其水不勝鴻毛
唐書 娑夷河弱水也

于寶曰崑崙之墟地首也是惟 之下都故其外

絕以弱水之深又環以炎火之山 柳宗元曰西

海之山有水焉散渙無力不能負芥故名曰弱地

志云在張掖郡刪丹縣薛氏曰弱水出吐谷渾界

窮石山自刪丹西至合黎山與張掖縣河合又按

通鑑魏太武擊柔然至粟水西行至菟音園水又

循弱水西行至涿邪音山則弱水在菟園水之西

涿邪山之東矣 十洲記曰崑崙山有弱水周廻

繞匝山東南接積石圃西北接北戶之室一云蓮

水三千里非舟楫萊隔弱漢書西域傳云條支臨西海

可行非飛仙莫到

長老傳聞條支有弱水西王母亦未嘗見自條支
乘水西行可百餘日近日所入也 舊唐書云東
女國王居康延川中有弱水南流用牛皮爲舩以
渡 程氏曰弱水初必壅遏而東旣導之西則逆
者順矣 林氏曰衆水皆東而弱水獨西黑水獨
南因其性與勢之自然也必欲東之則逆其自然
非行所無事矣

箋弱水去雍州甚遠而混流汎濫欲治主水先治
客水惟因其性而導之西使不復出沒于雍乃禹

治水之法也 考弱水在甘州衛西又西寧衛西
有西海方數百里有魚無鱗皆負黑點俗呼青海
河圖曰禹既治水功大天帝以寶文大字賜禹
佩渡北海弱水之難又十洲記曰禹治洪水既畢
乃乘躡車度弱水到鍾山祠上帝於北河此皆誕
妄難信 陳禹謨曰世謂弱水不能負芥漢武帝
時有人乘毛車以度弱水來獻香者毛車卽輕矣
豈尤輕于芥乎不能負芥而能負車此說之不可

兩存者

乘毛車事
見博物志

屬涓汭

傳水北曰汭言治涇水入於渭

疏屬謂相連屬

詩毛傳云汭水涯也鄭云汭之言內也蓋以人皆南面望水則北爲汭也地理志云涇水出安定涇

陽縣西岍頭山東南至馮翊陽陵縣入渭行千六

百里

淮南子云涇出薄洛之山高誘註薄洛一名開頭山括地志云笄頭山一名崆峒山在原

州平陽縣西百里涇水所出雅大記曰笄頭山在平涼郡西四十里其山如婦人笄頭之狀史記黃

帝西至於崆峒登笄

頭山今在靈州東南

山海經曰涇谷之山涇水

出焉東南流注于渭

郡縣志涇水源出百泉縣西南涇谷案三秦記及山海經

注涇水出安定朝那縣尹頭山東南
經新平扶風至京兆高陵縣而入渭

杜佑曰涇

入于渭經秦川而入河也在今新平郡宜祿縣水

經云汭經宜祿川俗曰宜祿

關中記云涇與渭

洛爲關中三川與渭灃滄澆澧鎬爲關中八水

三秦記曰涇渭合流三百里清濁不雜

潘岳

西征賦云清渭濁涇朱氏曰涇未屬渭之時雖濁

而未甚見二水旣合而清濁益分 杜預曰水之

隈曲曰汭王肅云汭入也呂忱云汭者水相入也

水會卽船司空所在矣地理志曰渭水東至船司

空入河

水經注

新安陳氏曰夏書以洛表對洛汭

則汭水北之曲也

蔡傳涇渭汭三水名渭水地

志出隴西郡首陽縣西南今渭州渭源縣鳥鼠山

西北南谷山也東至京兆船司空縣入河今華州

華陰縣也汭水地志作芮扶風汭縣弦蒲藪芮水

出其西北東入涇今隴州汭源縣弦蒲藪有汭水

周職方雍州其川涇汭涇水連屬渭汭二水也

韓聞秦東伐迺使水工鄭國間說秦令鑿涇水自

中山西抵瓠口爲渠並北山東注洛三百餘里欲

以溉田中作而覺秦欲殺鄭國鄭國曰始臣爲開
然渠成亦秦之利也秦以爲然卒使就渠渠成而
用溉注填闕之水溉烏鹵之地四萬餘頃收皆畝
一鍾於是關中爲沃野秦以富彊卒并諸侯因名
曰鄭國渠漢大始二年趙中大夫白公復奏穿渠
引涇水首起谷口尾入櫟陽注渭中袤二百里溉
田四千五百餘頃因名曰白渠民得其饒歌之曰
田於何所池陽谷口鄭國在前白渠起後舉重爲
雲決渠爲雨涇水一石其泥數斗且溉且糞長我

禾黍衣食京師億萬之口 陸務觀曰鄭白二渠
在今京兆府之涇陽皆以涇水爲源白渠灌涇陽
高陵櫟陽及耀州雲陽三原富平凡六縣斗門百
七十餘所今尚存然多廢不治鄭渠所灌尤廣袤
數倍於白渠涇水乃絕深不能復入渠口

〔箋〕按注疏以渭汭爲一水汭言水北耳涇水南入
渭乃名渭汭蔡氏始以涇渭汭爲三水謂涇居渭
汭之間仰承俯受連如貫珠然導渭不言汭而洛
汭媯汭並以水北爲義本州貢道亦云會于渭汭

則渭汭之爲一水明矣。鄒季友尚書音釋云：涇水先會汭水，後入渭水，則經當言涇屬汭，渭不當先渭而後汭。况下文卽有渭汭字，不可異說。當從孔傳水北曰汭，黃東發日抄云：古注謂水內爲汭。若如古說，涇入於渭水之內，而漆沮旣從澧水攸同，皆主渭言之，文意俱協。若以汭爲一水而入涇，則涇屬渭汭者是。涇旣入渭，汭又入涇，下文漆沮之從澧水之同，孰從孰同耶？職方氏其川涇汭，易氏解云：汭非禹貢之汭，禹貢言汭皆水內，此川名。

按蔡氏解堯典媯汭云水北又解東過洛汭云洛水交流之內今却自背其說當爲職方氏所誤而未覩易氏之解耳况導渭下止言澧涇漆沮絕不及汭 雍大記曰涇水自平涼府城西南自岩發源至涇州又東南至邠州界又東北至西安府涇陽縣界由涇陽東流至高陵縣會于渭

考陝西志
汭水在隴

州南七十里
出汭縣西北

王氏樵曰雍州之水渭爲大涇之

源最居雍之北境自北而南注以渭爲歸而汭東入焉是涇上屬于汭而下屬于渭也經不以渭立

文而曰涇屬渭汭以涇水在中先會汭水後入渭水順其勢而言故謂屬渭汭者涇而其實納涇者渭也

漆沮既從

傳漆沮之水已從入渭

疏地理志云漆水出扶

風漆縣西闕駟十三州志云漆水出漆縣西北岐山東入渭沮則不知所出蓋東入渭時已與漆合

山海經曰獮次之山漆水出焉北流注于渭蓋自北而南矣孔安國曰漆沮亦曰洛水也出馮翊

北水經曰漆水出扶風杜陽縣俞山東北入于
涇沮水出北地直路縣東過馮翊殺羽縣北東入
于洛 酈道元曰沮水自直路縣東南逕焦石山
東南流歷檀臺川俗謂之檀臺水屈而夾山西流
又西南逕宜君川世又謂之宜君水又東南流逕
殺羽縣故城西又南出土門山西又謂之沮水又
東北流注于洛水矣

水經注

寰宇記云漆水自同

官縣界來逕州北沮水自邠州入州至白渠澤泉
南合漆水俱入富平之石川河 蔡傳漆水耀州

同官縣東北界來經華原縣合沮水自坊州昇平
縣北子午嶺出俗號子午水下合榆谷慈馬等川
遂爲沮水至耀州華原縣合漆水至同州朝邑縣
東南入渭二水相敵故並言之地志謂漆水出扶
風縣晁氏曰此關之漆水經漆水出扶風杜陽今
岐山普潤縣地亦漢漆縣境其水入渭在澧水之
上與經序不合非禹貢之漆水也 段氏曰詩漆

沮入於渭之上流

自土漆澧言於岐周之間

書漆沮入於渭之

下流

言於東會於澧又東會于涇之下

雍錄曰雍地四漆沮而

實三派禹貢漆沮惟富平石川河正當其地它皆
非也何以知其然也曰禹貢叙載渭水首末有叙
可考也曰導渭自鳥鼠同穴東會于澧又東會于
涇又東過漆沮入于河則自渭原以至入河所謂
沮漆者僅常一見而其水行之序又在澧涇之下
則自澧涇而上凡後世名爲沮漆者皆非禹貢之
所嘗名也今以漢唐郡言之豐之入渭在蟄屋縣
境縣蓋咸陽西南也涇之入渭在陽陵則又在咸
陽之東矣漆沮入渭

即石川河

在漢馮翊之懷德縣卽

唐同州之朝邑縣也朝邑又在陽陵東北三四百里也故予謂石川之沮漆可應禹貢者爲其派序入渭在豐涇之東全與經應也

周漆沮

漢漆縣漆水唐普潤

縣漆水新

平縣漆水 縣之詩曰民之初生自土沮漆

普潤之漆水也

邠州雖有漆水不與縣詩相應

自遷岐爲始漢志扶風漆縣嘗有

漆水此漆縣疆境甚濶唐鳳翔之普潤暨邠州之新平其地本皆屬漆今從唐郡縣以求古地則公劉之邠自在邠州新平而太王之岐則在鳳翔之普潤故岐之與邠皆同隸漢世漆縣矣秦漢以後

皆言洛卽漆沮所謂洛水者地理志曰源出北豳
縣戎夷中今按其水自人塞後逕鄜坊同之三州
乃始入渭孔安國輩謂自馮翊懷德縣入渭者是
也漢懷德唐同州衙縣也

亦朝邑縣

所謂沮水者長安

志曰自邠州東北來

新平縣在邠州邠有涇水向陽陵入渭者在邠之南面而

此沮水之名石川河者亦在邠州境內乃在東北面不與涇水同派也

至華原縣南

流乃合漆水入富平縣石川河石川河沮水正派
也所謂漆水者長安志曰漆水自華原縣東北同
官縣界來南流入富平縣石川河是爲合漆之地

也此三水分合之詳也若繫三水而命其方則漆在沮東至華原而西乃始合沮沮在漆西既已受漆則遂南東而合乎洛洛又在漆沮之東至同州白水縣與漆沮合而相與南流以入于渭三水雖分及至白水縣遂混爲一流故自孔安國班固以後論著皆指懷德入渭之水爲洛水而曰洛卽漆沮者言其本同也若鄭白渠亦分沮漆之名誤矣蘇傳從如少之從長渭大而漆沮小故言從

大明一統志云漆河源出扶風古漆縣西沮河自

延安宜君縣西北俱至舊富平縣界合流入同州

朝邑縣東南注于渭

曹學佺曰沮水即洛水同流入渭故西魏以之名州矣

雍大記曰沮河西自高陵縣界來入臨潼縣界

流入下邽石川河亦曰沮河在臨潼縣東三十里

自華原富平兩縣來入縣界合渭水漆水在武功

縣東門外康子武功志曰漆水今謬爲武水者也

自鹵岐之間來縣北受洛水南受漳水入渭鄭漁

仲信漆由富平入渭之說蓋括地志未審鹵岐涇

渭脉絡所出富平在涇東漆在涇西安有岐梁之

水越涇而東再至富平始入渭也又曰同官川卽禹貢沮水也慈馬諸川遂爲沮水自耀州同安縣東北界來經縣北子午嶺出谷號子午水下合榆谷流入華源縣界合漆水此其源也同川卽禹貢漆水也韓邦奇曰漆水出鳳翔府隴州東入渭漢志右扶風有漆在正西指此沮水出鞏昌府階州角弩谷東南入渭二水入渭源派甚明但其地在澧水入渭之上惟考有洛水出慶陽府環縣卽古洛源縣也經延安府甘泉縣卽古雕陰縣也經

鄜州宜君縣子午嶺至中部縣入西安府界經耀
州及同官縣至富平縣合沮水歷蒲城同州至朝
邑縣東南入渭沿河人皆呼爲洛河顏師古曰洛
水卽漆沮也此後世指洛爲漆沮之由豈洛亦名
漆歟沮水出宜君縣至子午嶺合子午水歷中部
縣東南流入西安府界至富平縣合漆水卽洛也
子午嶺乃子午山一支其山歷延安慶陽西安三
府綿亘八百里蔡傳合榆谷川非也崇至同官縣
見一大潭水湧出三面皆青石山如壁立水流出

東壑問其居人曰漆潭正所謂自同官縣界來者

然至富平不百里卽入洛豈洛自洛漆沮二水皆

入洛歟但其水甚小禹何故舍洛而取漆豈無施

勞者雖大亦畧歟或者漆沮實鳳輦之水詩人詠

之亦名川也而經文有錯簡漆沮旣從當在澧水

攸同之前歟 陝西名勝志曰漆水旣自華原入

沮又自白水縣入洛洛漆沮至白水始混爲一又

自朝邑入渭故漢書謂洛卽漆沮也華原今省入

耀州漆沮下流爲石川屬富平

水經注云洛水東南沮水入焉故洛

水亦名漆沮水其境東南多白土因曰白水

王世懋曰出耀州城卽

從大川中行見漆沮二水流吾兩腋間蓋沮水自州城後折而東經五臺下南流而漆水忽自城右至按圖經當從扶風武功來者

澧水攸同

疏渭發源遠以渭爲主上云涇屬渭是矣此言漆

沮旣從已從於渭澧水所同亦同於渭以渭爲主故也地理志澧水出扶風鄠縣東南北過上林苑

入渭

黃圖出鄠南山豐谷

蘇傳澧渭相若故言同程大

昌自漆沮下流既已附從則上流不壅澧水亦遂東行也 鄭氏詩箋曰豐邑在豐水之西鎬京在豐水之東

箋弱水西流是治水之變者渭水東注是治水之常者叙水自西而東遡其流也叙山自東而西尋其源也 雍大記曰澧水出長安縣西南五十里終南山澧谷其源濶十五步下濶六十步水深三尺自鄠縣界來由馬坊村入咸陽合渭水老子云澧水之深十仞而不受塵垢金鐵在中形見於外

矣今考豐水在鎬京西二十五里源出秦嶺西北經子午谷西入豐谷北流諸谷水入焉爲西交河又北則東交河水入焉北經周豐也漢昆明池又北至矩陰山入渭見陝西志

荆岐旣旅終南惇物至于鳥鼠

傳已旅祭言治功畢此荆在岐東非荊州之荆

疏治水從下自東而西先荆後岐地理志云禹貢

北條荆山在馮翊懷德縣南

山下有荆渠即夏后鑄九鼎處

河

圖曰荆山爲地雌上爲軒轅星岐山在崑崙東南爲地乳上爲天縻星 郡縣志荆山在京兆府富

平縣西南三十五里在岐山東岐山亦名天柱山

在鳳翔府岐山縣東北十里

考陝西志
在西北

說文曰

岐山在長安美陽縣界山有兩岐因以名焉 釋

名曰道二達曰岐物兩爲岐也周地在岐山之南

其山四周也 詩譜周自太王居岐之陽地形險

阻而原田肥美皇甫謐云今美陽西北有岐城舊

趾郡國志岐山南有周原

傳終南惇物鳥鼠三山名言相望

終南秦記
又名地肺

疏

二山空舉山名不言治意蒙上旣族之文也地理

志云扶風武功縣有太一山古文以爲終南垂山

古文以爲停物皆在縣東烏鼠同穴山在隴西首
陽縣西南 雍錄曰終南山橫亘關中南面西起
秦隴東徹藍田凡雍岐郿鄠長安萬年相去且八
百里而連綿峙據其南者皆此一山也旣高且廣
多出物產故禹貢曰終南厚物也不當別有一山
自名厚物武功縣有太一山漢志引古文而曰太
一者終南也垂山者厚物也不知何所本而云然
李吉甫曰終南太一非一山關中記曰終南南山
之總山太一山之別號此其說是也吉甫在元和

間核關中終南山所歷而著諸郡縣自鄠郿武功以至長安萬年每縣皆著終南且曰在縣之某方某方之幾里則南山之在關中者常相聯接其不謬矣 柳宗元曰惟終南據天之中在都之南西至于褒斜又西至于隴首以臨于戎東至于商顏又東至于太華以距于關寶能作固以屏王室水經注曰終南杜預以爲中南亦曰太白山在武功縣南去長安二百里不知其高幾何俗云武功太白去天三百山中軍行不得鼓角鼓角則疾風

南至

雍錄云古圖志無言太白即爲太一者

關中記曰終南一名

中南言居地絡陰陽之中卽所謂中條山而在都城之南者也其南山深處高而長大無異名者曰

秦嶺

三秦記曰秦嶺東起商洛西盡汧隴綿亘

千里蓋南山之脊江河之水所由分處故嶺南之

水皆謂之江嶺北之水皆謂之河

嶺水北流入渭號入百秦川又

耀州五臺山名北五臺在終南者曰南五臺見陝西志

馬理曰三原縣嵯峨山古名荆山特出雲表登其

巔則涇渭黃河舉在目前視秦中如指諸掌矣史

載黃帝鑄鼎于荆山今山陽有鼎州宋敏求雲陽志山嵯峨一名巖葉山又名慈峨山四夷郡縣圖記曰山頂有雲氣卽雨人以爲候昔黃帝鑄鼎于此山則此爲荆山其証甚明舊志謂富平縣城南掘陵原此唐之獻陵非山也

秦傳云荆山今耀州富平縣掘陵原

何景明曰太華終南太白寶一山延亘不絕太華在華陰終南在咸長太白在郿各望其地異號命爾其山首枕嵩芒尾貫羗蜀表裏秦關益邦域大

紀云

雍大記曰終南在西安府南五十里東自藍田縣界西入咸寧縣界石鰲谷以谷水出與

長安咸寧二縣分界東西四十里左氏傳曰荆山終南九州之險也又考終南山連亘藍田咸寧長安鄠鰲厓五縣之境見陝西志

舊陝志曰秦嶺南爲地絡之陽山爲南列南條水則爲江州則爲梁北爲地絡之陰山爲北列北條水則爲河州則爲雍星野亦於此分焉是地之脊也

原隰底績至于豬野

傳下濕曰隰疏地理志云豬野澤在武威縣東北有休屠澤古文以爲豬野澤鄭玄以爲詩云度其隰原卽此原隰是也原隰幽地從此致功西至

豬野之澤也 郡縣志邠州新平縣有五龍原未

壽縣有未壽原宜祿縣有淺水原

邠州今

水經注

曰都野澤其水上承姑臧武始澤澤水二源東北

流爲一水姑臧縣故城西東北流又東北逕武威

縣故城東漢武帝太初四年匈奴渾邪王殺休屠

王以其衆置武威縣武威郡王莽更名張掖地理

志曰谷水出姑臧南山北至武威入海屈此水流

兩分一水北入休屠澤俗謂之爲西海一水又東

逕一百五十里入豬野世謂之東海通謂之都野

矣

箋案陝志今豬野澤在涼州衛東北魏太武伐涼謂姑臧無燥地澤草茂盛水土乃爾可想禹所爲底績也 王氏樵曰施工自下而上成功自高而下

三危旣宅三苗丕叙

傳西裔之山已可居三苗之族大有次叙美禹之功 疏地理志杜林以爲燉煌郡卽古瓜州也左傳云先王居橈杙于四裔故允姓之姦居于瓜州

杜預去允姓之祖與三苗俱放於三危瓜州今燉煌也 山海經曰三危之山三青鳥居之是山也

廣圓百里在烏鼠山西卽尚書所謂窳三苗于三

危也瓜州地名州出好瓜民因氏之瓜州之戎并

於月氏者也漢武帝後元分酒泉置南七里作鳴

沙山故亦曰沙州也

水經注

呂覽曰禹西至三危

之國巫山之下飲露吸氣之民積金之山

西方金氣所積

武夷熊氏曰首言弱水終言三危極其遠而言

之

杜佑曰三苗本有苗氏之族今長沙衡陽間是徙居於此分而爲三 周景式云柴桑彭澤之間古

三苗國左洞庭右彭蠡負因而亡者今衡岳潭之

境而南海亦有三苗國

記云禹伐有三苗其餘裔叛以入南海

馬端

臨曰昔舜流三苗於三危其後子孫爲羗戎代有

其地謂之瓜州地多生若瓜至今猶出大瓜長者

狐入其中首尾不出

黃氏曰羗本姜姓三苗之後居三危今疊宕松諸州皆羗

地

朱子曰頃在湖南見說溪洞蠻徭畧有四種

曰獠曰狠曰狠而其最輕捷者曰猫近年數出剽

掠爲邊患豈三苗氏之遺民乎詹元善說苗民之國三徙其都初在今之筠州次在今之興國軍昔在深山中人不可久而已亦難出最後在今之武昌縣則據江山之險可以四出爲寇人不得而近之矣 呂祖謙曰三苗有罪自當竄逐發政施仁自當及之故治水至三危亦旣使安居大得其叙後世以爲投之四裔若絕之者非聖人之心也

〔箋〕按後漢西羌傳註三危山在今沙州燉煌縣東南山有三峯故曰三危西羌之本出自三苗其國

近南岳及舜徙之三危河關之西南羗地是也至

漢武帝西逐諸羗初開河西列置酒泉武威張掖

燉煌四郡

陝西舊志三危山三峯聳出雲表故曰三危雍大記曰三危山在行都司沙州

衛東南俗名昇兩山

丘氏濬曰夷狄之見於經始於三苗

帝舜授禪既首窺之于三危至禹治水時其窺者

既丕叙其留者猶不卽工故命禹徂征及後來格

考其善惡而分背之今自巴蜀以東歷湖南北桂

嶺雲貴數千里溪崗山菁之中有曰犵曰狔曰狝

曰猺曰獠之類凡十數種皆所謂蠻也其間最輕

捷者曰猫說者謂此卽三苗之後也然今之猫依

山以居若猿猴然無定居無常業不相統屬 國

初於湖北川東立宣慰司者五曰永順曰保靖曰

貴州曰思州曰播州又有宣撫司安撫司及招討

司長官之設外此所謂軍民府及軍民指揮使司

者又兼設土官以轄其夷人隨地設官因俗爲治

善者授以職惡者分其勢蓋得有虞分背之義也

貢丕叙之意也 王綱振曰舉三危重黑水治導

黑水至于三危故也首節志弱水治

厥土惟黃壤

新安陳氏曰土黃壤最貴故雍田上上塗泥最下
故楊田下下 董仲舒曰五行莫貴於土五色莫
盛於黃 淮南子曰色有五章黃其主也位有五
材土其主也 金氏曰黃土之正色而又細柔故
厥田爲九州第一後世號關中爲沃野謂之天府
蓋以此也然就其間較之亦惟涇渭澧漆之區最
爲沃壤西北二邊逼于戎狄故禹于雍州自終南
至鳥鼠則自東而西自原隰至豬野三危則自內

而外賦出六等生聚蓋不同也至戰國秦漢富庶
甲天下唐不如宋滋不如西有夏北有契丹雍蕞
悉非古矣雖關中亦仰東南之粟古今地利之不
同豈無其由哉

厥田惟上上厥賦中下

傳田第一賦第六人功少一疏此與荊州賦田升
降皆較六等荊州升之極故云人功脩此州降之
極故云人物少其餘相較少者從此可知也 東
方朔曰鄠鎬之間號爲土膏賈畝一金田上上可

知

箋考輿地記勝鞏昌郡有耕天村其田之良者曰
雲下田今文縣所轄也

厥貢惟球琳琅玕

傳球琳皆玉名琅玕石而似玉

山海經云崑崙山有琅玕樹

疏釋地云西北之美者有崑崙虛之璆琳琅玕焉

說者皆云球琳美玉名琅玕石而似珠者

禮記笏天子以

球玉鄭氏註球美玉也

拾遺記曰崑崙山有琅玕璆琳之

玉煎可以爲脂

唐代宗時楚州獻定國寶十二

有琅玕珠二枚徑一寸三分見西陽雜俎許杜綰

石譜云明州昌國縣沿海近淺岸水底生琅玕狀

如珊瑚或高三二尺初出水色甚白經久微紫黑

輒山海經曰峯

音峯

山其上多丹木丹水出焉西流

注于稷澤其中多白玉是有玉膏黃帝是食是饗

是生玄玉黃帝乃取峯山之玉榮而投之鍾山之

陽瑾瑜之玉爲良 漢書曰藍田縣出美玉周禮

曰玉之美者曰球其次曰藍三秦記曰縣出美玉

故名藍田括地志曰驪山之陽多美玉 張世南

曰玉出藍田崑岡本草亦云好玉出藍田及南陽
徐善亭部界日南廬容水中外國于闐疎勒諸處
皆善今藍田南陽日南不聞有玉國朝禮器及乘
輿服御多是于闐玉其採玉處云玉河在國城外
源出崑山西流于三百里至國界牛頭山分爲三
曰白玉河在城東三十里曰綠玉河在城西二十
里曰烏玉河在綠玉河西七里源雖一玉隨地變
故色不同每歲五六月水暴漲玉隨流至多寡由
水細大水退乃可取方言曰撈玉國主未採禁人

至河濱大抵今世所寶多出西北部落西夏五臺
山于闐國玉分五色白如截肪黃如蒸栗黑如點
漆紅如雞冠或如臙脂惟青碧一色高下最多端
帶白色者漿水又分九色上之上之中之下中
上之中之下上之中之下 桓公問管子曰
吾聞海內玉幣有七筴可得而聞乎管子對曰陰
山之磻磻一筴也燕之紫山白金一筴也發朝鮮
之文皮一筴也汝漢水之右衢黃金一筴也
之珠一筴也秦明山之曾青一筴也禹氏邊

玉一筴也又曰吳越不朝珠象而以為幣乎發朝

鮮不朝請文皮毼

落毛也

服而以為幣乎禹氏不朝

請以白壁為幣乎崑崙之虛不朝請以璆琳琅玕

為幣乎

林駟曰禹貢揚之貢金雍之琳琅不幾

如漢人酎金之誅乎荆之大龜梁之熊皮不幾如

漢人天馬之求乎青之海錯揚之橘柚不幾如唐

人貢荔之病乎曰古者以貢為賦正什一便民之

法禹貢服食之外器用次之器用之外寶玉玩好

又次之故貢金琳琅大龜熊皮海錯橘柚之屬皆

爲土貢之物也皆償田賦之輕也聖人初何心過求哉

箋聞之舜禹之世捐珠抵璧乃九州制貢旁采金玉以及珠璣國有經費胡可缺也唐玄宗初政焚珠玉於殿前識者因已窺其好名鮮終矣 國家珠玉不以入賦唯遇有典禮論旨采辦粵中有珠池蛋人守之而玉則必鬻之西域天方等國 世廟中嘗以郊祀懸購黃玉亦復不易得頃歲民間珠價幾倍於玉此真寒不可衣饑不可食而靡俗

顧紛然珍貴空爲耳目之玩抑獨何與 李維禎
曰琅玕見禹貢爾雅山海經蓋珠也或云樹之子
似珠或曰流離之類有五色符瑞圖則云玉有光
景者而後人以名竹 丘氏濬曰漢時關中之藍
田幽州之玉田皆出玉其時西域未通也今中國
所用之玉皆來自于關有白玄綠三種皆出于河
亦與古異抑土石之精其生有限而取之有盡古
人比德于玉用爲器用雜佩之屬不一而足是玉
在古多而爲用夥今世小民有不識王者由是推

之漢之金以斤計每以萬言唐漸少宋與今益少
無乃數千歲之後中國之金將與玉同邪不可不
爲之限節也又曰考古今所謂寶者三代以來中
國之寶珠玉金貝而已漢以後西域通中國始有
所謂木難琉璃瑪瑙珊瑚瑟瑟之類 王氏樵曰
貢物除冀州外雍梁二州無篚餘六州皆有篚篚
皆籩貢衣服之用言錫者三揚橘柚荆大龜豫磬
錯言包者二揚橘柚荆菁茅言織皮者二荊州梁
州織皮製之爲裘織之爲罽與單言皮服不同

胡氏瓚曰九州之貢雍最寡而揚荆最多已啓後
世文物之漸矣

浮于積石至于龍門西河會于渭汭

傳積石山在金城西南河所經也沿河順流而北
千里而東千里而南龍門山在河東之西界疏

地理志云積石山在金城河關縣西南羗中河行
塞外東北入塞內千里一曲一直龍門山在馮翊
夏陽縣北此山當河之道禹鑿以通河 李氏滂
水集云同州韓城縣北有安國嶺東西四十餘里

東臨大河瀕河有禹廟在山斷河出處禹鑿龍門
起於唐張仁愿所築東受降城之東自北而南至
此山盡兩岸石壁峭立大河盤東於山硤間千數
百里至此山開岸濶豁然奔放怒氣噴風聲如萬
雷 魏土地記曰梁山北有龍門山大禹所鑿通
孟津河口廣八十步巖際鐫跡遺功尚存 王應
麟曰河至慈州文城縣孟門山是爲入龍門至絳
州汾州合河之上是爲出龍門口 慎子曰河之
下龍門流駛如竹箭駟馬不能及 三秦記曰龍

門一名河津去長安九百里水懸絕龜龍之屬莫

能上上則化爲龍矣

埤雅鮪仲春從河西上得過龍門便化爲龍否則點額而

還

武夷熊氏曰正道皆從渭達河惟山脊以西

不可通處必自積石之河經涉龍門然後達于西河以至帝都也

傳逆流曰會自渭北涯逆水西上

蘇傳渭水至

長安東北入河河始大自渭汭而下巨舟重載皆可以達冀州矣

漢初轉漕巴蜀租賦以給關中天下既定國用寢

廣於是歲漕關東粟以給中都官然亦不過數十萬石而已至武帝則四百萬石後又益六百萬石大抵多取於山東諸郡從渭水而上唐都關中號稱沃野土地狹不足給京師常轉漕東南之粟高祖太宗時用物有節水陸漕運歲不過二十萬石高宗後歲益增多開元二十一年裴耀卿請置東西倉以避三門水險自河陰西至太原倉浮渭以實關中二十九年李齊物鑿砥柱爲門以通漕然水益湍怒舟不能入天寶三載韋堅爲陝郡太

守兼水陸運使以代之始漢有運渠起關門西抵長安通山東租賦訖隋常治之堅爲使乃占咸陽壅渭爲堰絕灞澹並渭而東注永豐倉下復與渭合

永豐倉下在渭水入黃河處漢之船司空也

是歲漕山東粟四百萬

石東萊呂氏曰漢都長安唐亦都長安至唐方以漕運爲大事大率漕運多是江淮之粟到關中極迢遞自江入淮自淮入汴自汴入洛自洛入黃河自黃河入渭方至關中每一番發江自二月起程至五月方到汴河七八月間方到入黃河十止

八九况用吳人般運在所不便裴耀卿措置轉運
隨處交納更番雖可稍停民力當時民丁約四百
萬使丁出錢一百爲漕運費又益半爲營窟亦大
擾民矣 歐陽脩曰今京師在汴漕運不西不知
秦漢隋唐其都在雍則天下之物皆可致之西也
漢初歲漕山東粟數十萬石是時運路未脩其漕
尚少其後武帝益脩渭渠至漕百餘萬石隋文帝
時沿水爲倉轉相運置而關東汾晉之粟皆至渭
南運物最多其遺倉之跡往往皆在然皆尚有三

門之險自唐裴耀卿又尋隋迹於三門東西置倉
開山十八里爲陸運以避其險卒沂河而入渭當
時歲運不減二三百萬石其後劉晏遵耀卿之路
悉漕江淮之米以實關西後世言能經財利而善
漕運者耀卿與晏爲首今江淮之米歲入於汴者
六百萬石誠能分給關西得一二百萬石足矣今
宜浚治汴渠按求耀卿之迹不憚十許里陸運之
勞則河漕通而物可致且紓關西之困

箋導河始乎積石亦卽以爲貢道治河因以治漕

蓋不獨今日爲然也考春秋時秦輸粟于晉自雍
及絳相繼命曰汎舟之役正義曰秦都雍雍臨渭
晉都絳絳臨汾渭水從雍而東至華陰入河從河
逆流而北上至河東汾陰乃東入汾逆流東行而
通絳蓋穿渭渠轉漕入河其從來固已久矣王
氏樵曰按蔡氏云雍之東北境則自積石至于西
河西南境則會于渭汭東北當云西北蓋雍東距
河若東北境則直浮西河不須浮于積石也積石
在今臨洮府河州西北一百二十里兩山如削中

流黃河西臨蕃界龍門在今西安府韓城縣東北
八十里河水至此自山直下懸水百仞濺沫如雨
濤聲如雷地皆震撼兩崖斷山絕壁相對如門惟
神龍可越故曰龍門計浮于積石而來者至于龍
門之上則止此一道也浮渭而來者則會于渭汭
此又一道也蔡氏所以知其爲兩道者以龍門非
可越而渭自烏鼠而東中貫雍境取漕莫徑焉使
內地之漕則當徑達西河更無用經涉龍門以此
知其爲西北一道西南一道也 鄭氏曉曰水北

曰泂蓋渭之北也貢賦之來或由漆沮或由涇澧
皆會于渭水之北而入河泂字下得甚當今渭水
舟楫入蒲州必經渭北岸蒲州卽冀州也惟往陝
州者由南岸或中流耳 吳寬曰禹貢曰浮曰沿
皆指舟行水而言若大車轉之法未著至漢都關
中始穿渠引渭以漕關東之粟其後又引汾引河
以漕又其後通褒斜道自沔入褒褒絕水至斜間
百餘里以車轉從斜下渭 于慎行曰漕之藉河
禹貢以來有之匪自今也禹畫九州冀爲都會河

流碣石以入于海堯浮濟潔青浮汶濟徐浮淮泗
揚浮江漢豫浮於洛梁浮潛沔以入于涓雍浮積
石至於龍門未有不通於河者也漢唐皆都關中
漢漕山東粟百萬更砥柱之險以遵於涓唐漕江
淮之粟由汴入河由河入洛以達于涓亦未嘗不
藉河也 天順三年戶部尚書楊鼎上言阿羅出
住牧河套數入寇掠費用浩繁惟黃河乃漢唐漕
運河卽今鹽船木筏往來不絕其間雖有三門折
津之險而古人倒倉之法爲當三門之上有小河

徑通延綏如以所運糧草各貯水次溯流僭運庶
幾軍餉可足民力亦蘇或摘漕糧數千石赴陝就
令教習山西陝西河南之人待舟楫通後乃許廻
運且可順帶解鹽數十萬以充淮課則國利大有
增矣詔從之後阻不行 王氏樵曰河從積石北
流入北狄界中折而東流凡二千餘里漢人謂之
北河其內今謂之河套卽秦始皇所斥奪匈奴河
南地也在古以爲通舟轉輸之道蓋唐虞聲教暨
于朔南冀之北垂遠出河外猶在荒服此其所以

不可及也三代之季北狄入居河內秦始皇逐出
之秦楚劉項之際復爲匈奴所據漢武帝開朔方
復取之唐築三受降城卽其處宋時爲西夏所據
河內外州郡凡二十有二以一隅之地能抗衝中
國蓋其地肥饒其人勁悍又產健馬乃關中之屏
蔽得之則強失之則弱歷代知其爲邊境之要害
而不知其爲唐虞之故疆也蔡氏引李復之說疑
積石至龍門三千里通舟無阻以後世之迹質之
于經多所不合然神禹導川通貢著其道路所經

明若指掌觀此曰浮于積石至于龍門西河後曰
導河積石至于龍門曰導曰至非河通流至于龍
門之驗邪曰浮曰至非舟通行至于龍門之驗邪
李復所奏一則恐出吏民之托辭一則故道久廢
岸谷變遷復之所指亦恐非禹迹之舊矣不特此
爾北河之外陰山橫亘華夷大限當以此分虜得
之則據以窺中國中國得之則據以窺虜乘高以
望出沒踪跡皆見其外皆大磧南北數千里東西
數千里無水草不可駐牧虜若不得陰山必踰大

磧而居其北北卽漠北也昔漢武帝驅虜于陰山之外而漠南無王庭虜過之未嘗不哭漠南卽陰山之南黃河之北虜所利以飽其力而內犯者也奈何北河之內復使得爲巢窟哉

織皮崑崙析支渠搜西戎卽叙

傳織皮毛布有此四國在荒服之外流沙之內羗

髳之屬皆就次叙明禹之功及戎狄也

馬云崑崙在臨羗西

析支在河關西漢書志朔方郡有渠搜縣

疏四國皆衣皮毛故以織

皮冠之崑崙也析支也渠也搜也皆是戎狄末以

西戎總之鄭玄云衣皮之民居此崑崙析支渠搜
三山之野者皆西戎也鄭併渠搜爲一 山海經

曰崑崙之丘是實惟帝之下都 博物志曰漢使

張騫渡西海至大秦西海之濱有小崑崙高萬仞

方八百里

雍大記曰崑崙山在肅州衛城西南二
百五十里與甘州山連其嶺峻極經夏

雪不消世
呼雪山

武夷熊氏曰崑崙唐書以爲吐蕃界

析支卽今陰山河南等處 後漢西羌傳曰河關

之西南羗地濱於賜支至乎河首綿地千里賜支

者禹貢所謂析支者也

舊唐書曰宛項羗在古析
支之地今考寧夏東北河

水遇山折爲二
枝處有折枝城

唐書吐蕃本西羌屬蓋百有五

十種散處河湟江岷間有發羌唐旄等然未始與

中國通居折支水西

河湟卽今陝西西寧河州等處江岷卽今陝西岷洮州及

四川松茂等處

司馬彪曰西羌者自折支以西濱於河

首在右居也河水屈而東北流逕於折支之地是

爲河曲矣應劭曰折支在河關之西東去河關千

餘里羌人所居謂之河曲羌也 漢書西域論曰

孝武圖制匈奴患其兼從西國結黨南羌乃表河

曲列四郡開玉門通西域以斷匈奴右臂隔絕南

羗月氏單于失援由是遠遁而幕南無王庭 異
物志曰古渠搜國當大宛北界 三朝記曰北發
渠搜南撫交趾 逸周書曰渠搜以鼯犬鼯犬者
露犬也能飛食虎豹 金氏曰雍州西界黑水此
諸國又在黑水之外故附于後以織皮冠之者此
皆皮服之國貢織皮者也

大戴禮曰西辟之民曰戎勁以剛至于大遠有不
火食者矣 白虎通曰西方爲六戎戎者強惡也
逸周書曰正西崑崙狗國鬼親枳已關耳貫胸

雕題離丘漆齒

九者西戎之別名

後漢西戎傳秦襄公

攻戎救周及平王之末戎逼諸夏自隴山以東及

乎伊洛徃徃有戎於是渭首有狄貊音邽冀之戎

涇北有義渠之戎洛川有大荔之戎渭南有驪戎

伊洛間有揚拒泉皐之戎潁首以西有蠻氏之戎

尹洙曰西戎爲寇遠自周世西漢先零東漢燒

當晉氏羗唐禿髮歷代侵軼爲國劇患 宋哲宗

時陳并上論云凡言禦西戎多以斷西北交結之

勢漢武命衛霍空其穴列爲張掖酒泉武威燉煌

等郡魏晉以來赫連等互據西河涼州奄有靈夏
唐開西域始復其地置都護節度僖宗以後例授
功臣五代擾攘封李仁福爲西平王太祖經畧燕
興襲領節鉞至四世繼遷叛盡據夏宥銀綏之地
矣 蘇轍西戎論曰北狄強則中國不得不厚西
戎之君而西戎之君亦將自托於中國然而西戎
非有強力自負之國則其勢亦將折而入於匈奴
蘇傳禹貢之所篚皆在貢後立文而青徐揚三州
皆萊夷淮夷島夷所篚此云織皮崑崙析支渠搜

西戎卽叙大意與上三州無異蓋言因西戎卽叙而後崑崙析支渠搜三國皆能織皮但古語有顛倒詳畧爾其文當在厥貢惟球琳琅玕之下其浮于積石至于龍門西河會于渭汭三句當在西戎卽叙之下以記入河水道結雍州之末

箋雍州逼近戎狄都關中者每防戎患嘗考周自文王攘卻西戎岐豐以寧及其亡也犬戎侵軼而周以東遷則西戎卽叙其關係雍州可睹矣鄭氏曉曰雍州貢織皮之崑崙非河源也河源崑崙

去中國不知幾萬里佛經謂之胥靡山 王綱振

曰三危遠在中國三苗頑甚而迪功與十二師五
長同故云丕叙西戎去中國更遠非我族類而卽
工與三苗同故云卽叙叙卽府事脩和之叙又曰
特識西戎于雍州貢道之後此非脫簡蓋雍乃秦
地卽周豐鎬漢三輔皆嘗建都于此觀周有犬戎
漢有匈奴當在虞夏不有先見其微者乎時卽不
近帝都亦且列在要荒聖人經理五服不以遠遺
故又發此例與三苗並識見夷蔡蠻流無不就治

耳亦因下叙導山故此先結以雍州境外之山起
下雍州境內之山然終不可與境內諸山混紀特
附分州之末以見皆禹所導也 胡氏瓚曰織皮

言于三國之上者亦荊州三邦之例以此而知其
就功也九州已終故發例于此以明成賦止于中
邦而底貢多及于外夷兗州地狹青徐又包其外
豫州中土秦晉方遷陸渾之戎于伊川無夷可知
荊本荆蠻又非他州比也 鞏昌府志云隴以西

相傳槩云戎羗所居夫戎居北海羗居西海若風

馬牛之不相及也史記秦穆公

西征

得由余西戎八

國服于秦故隴以西有綿諸緄戎翟獯之戎各散
居谿谷猶雒邑之雒戎徐州之徐戎也范曄後漢
書云王莽時以西未附遣中郎將多持金幣誘塞
外羌使獻地內屬羌豪良願等獻西海鹽池平地
目居險阻爲藩籬然則隴以西春秋時戎始入錯
居西漢末羌始入錯居也

大明一統志曰西蕃卽吐蕃也其先本羌屬居析
支水西後有樊尼者西濟河逾積石居跋布川或

邏娑川隋開皇中有論贊索者居畔河西唐貞觀
中始通中國旣而滅吐谷渾盡有其地至唐末衰
弱種類之散入內屬者謂之熟戶餘謂之生戶宋
時朝貢不絕其首領唃廝羅始居鄯州後徙青唐
元憲宗始於河州置吐蕃宣慰司都元帥府又於
四川徼外置碉門魚通黎雅長河西等處宣撫司
世祖時復郡縣其地 本朝詔吐蕃各族酋長舉
故有官職者至京授官賜印因俗爲治 陝西志
曰河套舊名析支渠搜又名新秦中又名朔方郡

地其周迴六七千里土肥饒可耕桑三面阻河虜
難入寇而我易防守今失之使虜巢其中營門庭
之內容狐鼠焉 河套東至山西偏頭門地界西
至寧夏鎮地界東西二千餘里南自邊牆北至黃
河遠者八九百里六七百里近者二三百里惟黃
甫川稍近川南焦家坪兩岸夾山木先合後洋及
娘娘灘羊圈子渡口交冬冰堅故胡虜率其衆或
自坪或灘或渡口以入套 陝西
舊志 唐樞曰宋种世
衡城清澗 本朝成化九年余子俊城榆林去清

澗外二百餘里是爲大鎮東起黃甫川西至定邊營長亘一千三百里橫絕河套之口內復壘山湮谷以爲夾道地利亦多丘氏濟曰按朔方軍卽今河套地也唐初與突厥以河爲界則固嘗守河矣張仁愿所築三受降城皆在黃河之北大漠之南史謂中城南直朔方意今河套之地西城南直靈武意今寧夏之地東城南直榆林意今在綏雲之間說者謂東勝州卽古東受降城所在其地最腴宜馬國朝設東勝衛於此其後移於內地

鄭氏曉曰陰山在山西陝西之北河流南折橫亘
千里西出賀蘭東踰燕薊而抵醫無閭重山連阜
峻嶺懸崖隔闕北狄過此山後砂磔無水草名爲
大磧虜駐此人畜皆乏食武帝遣衛青取朔方奪
陰山險要皆爲我有虜騎馳突嘗在大磧之外二
受降城正在陰山山上瞭虜出没皆見我易陽禦
後世棄而不守虜得陰山又入河套於是虜日強
而中國困矣

考今關陝爲古雍州河山百二自昔王者適居龍

驥虎視形勝最於海內 國朝邊戍自遼海以迄
玉門稱重鎮者九關陝實居其四羗虜交訌亦大
煩戎索矣唯是榆林向屯勁兵土著並能當虜而
關中物力饒裕素能自給中外隱然倚爲扞蔽乃
頃歲疆事幾同塵飯流寇颺發所在束手而西戎
欵關天末祗爲賈胡生端漁利耳自漢祖轉餉關
中卒定天下而鄭白之渠荷鍤成雲並引涇渭以
廣溉田然則厥田上上禹規畫具在可按也而虛
口糜餉空奉當敵欲以坐制羗虜侈言織皮之貢

其能久乎